

Oh che sproposit delà a un Paisan,
 Ch' a l' an d' servei baravantan;
 A son stissos
 E pontilios,
 E pr l' interesse a vendrìo la gent,
 Pare e mare, e tuti i parent.
 Oh là, ecc.

Gnun Botegari e gnun Artisan
 Avran l' onor d' sporsie la man;
 Prchè coui li
 Part son fali,
 E part a s' angigno pr rif e pr raf
 A vive sui so ciaraf.
 Oh là, ecc.

Da già ch' i sai nen a chi l' ai da dè,
 Ch' a staga ampò da maridè;
 Almanch così,
 E chila e mi
 Staroma tranquij an nostra vita durant,
 Coul l' è 'l ripiegh 'l pi sbrigant.
 Oh là, ecc.

Da già ch' i seu pa a chi l' ai da dè,
 Così i sarai
 Fora dij guai
 Tant mi com' mia fiëta.

Del Ferravecchio.

CANZONE XXXI.

Sa chi veul vende l' mnù,
 Mi son 'l feramiù,
 Ch' i compro bon e gram;
 Lasseve ranchè i dent,

- Mi ij cato prontament,
 Pagandie lon ch' a valo,
 Lon ch' a valo,
 Ch' a l' è sing sold al sent. 2
- E s' i voleisse ancor
 Peui vendme pr dsor
 Vostre mangioire ansem, 2
 Mi tant ij comprerai,
 E bin ch' i v' ij pagrai,
 Senza ch' i m' fasse credit,
 Fasse credit,
 Prchè mi veui gnun guai. 2
- Mi son un om d' angign,
 Ch' i cato fin ij sign,
 E le parpeile d' j' eui; 2
 I comprereu i cavei,
 La pel, e fin i buei,
 Giustomse mach del pressi,
 Mach del pressi,
 Ch' a sio brut o bei. 2
- Mi son si pr catè
 Finna j' onge dij pè,
 E coule ancor dle man, 2
 Con pat e condission,
 Foma poche rason,
 Ch' a sio tute antreghe,
 Tute antreghe,
 E nen a toch e pson. 2
- Pr le servele peui,
 L' è giusta lo ch' i veui,
 E ch' i vad mat cercand; 2
 I na treuvo con stent,
 E particolarment
 An testa dle fumele,
 Dle fumele,
 Ch' a son mach pienne d' vent. 2

- D' lenghe mi na veui nen,
 Ch' i n' eu già un arbi pien,
 Ch' a m' ambarasso mach, 2
 I na veui pi catè,
 Prchè a s' peulo pa esitè,
 A l' è una marcansia,
 Marcansia
 Pi prest da lassè stè. 2
- I comprereu an tal cas
 Pi prest j' orie e 'l nas,
 Ch' a m' torna un pò pi a cont, 2
 J' orie an conclusion
 Son bonne a fè d' tacon,
 Dij nas i na peus fene.
 I na peus fene
 Dij bei e bon stopon. 2
- S' i j' aveisse dij gavass,
 Ch' a v' deisso d' ambarass,
 Feje tajè a me cont, 2
 Pur ch' a sio un pò grossat,
 E nen sti peit cassat,
 Mi tant i compro ancora,
 Compro ancora
 Pr fene dij barlat. 2
- I marcandreu i polmon
 Mediante ch' a sio bon,
 Nè mangagnà, nè toch; 2
 E su tuti i marcà
 Savi lo ch' j' eu pagà?
 Tre sold e mes la lira,
 Mes la lira
 Cheur, fidich e corà. 2
- Dij laver e manton,
 S' i na voli un doson;
 Ciapeme dunna al mout, 2
 E s' i voli ant un bot

- Tre psëte del gariot,
 O sia dla garsamela,
 Garsamela,
 I dagh man al borsot. 2
- Voli vende i genoi?
 Mi ij cato tuti doi
 Pr fene d' massucat, 2
 E peui s' a v' agradis,
 I pio deo i polpis,
 O sia bout dle gambe,
 Bout dle gambe,
 S' a son dur e massis. 2
- L' è giustament ancheui
 Coul di ch' i cato j' eui,
 Perdi pa st' ocasion, 2
 E fevie prest gavè
 Tra tant ch' i conto i dnè,
 Prchè mi seu pa dive,
 Seu pa dive
 Quand i podreu tornè. 2
- Vendme le man e i bras,
 I ciape un mes crosas,
 Cosa volive d' pi? 2
 I pio deo 'l rastel
 Dla schinna, s' a l' è bel,
 Dasandve quatr lire,
 Quatr lire,
 Ch' ij tire pa al masel. 2
- Volive vende j' os,
 Mi ij cato pcit e gros, 2
 E ij pago doi sold l' un;
 Andé dont i vorì,
 Miraco s' i trovri
 Un autr ch' veuja deve,
 Veuja deve
 Tant com' i v' smonno mi. 2

I nerv da sul copat
 Tut giù fin sui garat
 Mi ij compro tuit afait, 2
 A j'è la tassa an scrit,
 Pro feita ancor da drit,
 A sing e doi la lira,
 Doi la lira,
 Cosa voli tni dit? 2
 O via, somne anteis?
 Ch' i dagha man al peis?
 Contomne dij quattrin? 2
 A m'è pa vantagios
 A stè si tant ossios,
 Sbrigoma prest le facende,
 Prest le facende,
 S' no steme tuit giojos. 2

Le Serve dei Preti Secolari.

CANZONE XXXII.

S' i m' voleisse dè da beive,
 Mi v' cantria una canson
 Su le serve d' certi Preive
 Tabaleuri, e trop mincion;
 I voria ch' i rieisse
 Vostra part sicurament,
 E ch' da pr tut ij dieisse
 Ch' a v' ha dait divertiment.
 Sul prinsipi ste patête
 Venta vede com' a fan,
 A stan nen a fè d' barslète,
 Leste an gamba, adrete d' man;